

toki musi lili

tan jan Lakuse

ni li tawa jan sin pi toki pona!

[toki lili nanpa wan: soweli suwi](#)

[toki lili nanpa tu: ilo sitelen](#)

[toki lili nanpa tu wan: musi sike](#)

[toki lili nanpa tu tu: kili sin](#)

[toki lili nanpa luka: tawa suli](#)

[toki lili nanpa luka wan: esun](#)

[toki lili nanpa luka tu: olin mun](#)

toki lili nanpa wan: soweli suwi



soweli suwi li lon!
mi lukin e soweli suwi.
kute pi soweli suwi li suli.
soweli li lukin e mi.
n.....
soweli li wile e seme?
soweli li lukin e mi tan seme?
mi sona ala.
a, soweli li tawa.
tawa pona, soweli o!

toki lili nanpa tu: ilo sitelen




mama mi li jo e ilo.
ilo li ken pali e sitelen.
ilo li mani mute.
mi wile kepeken ilo.
taso, mama li wile ala e ni.
mi awen. mi awen. mi awen.
tempo ni la, mama li lukin ala.
mi tawa ilo. mi wile kama jo e ilo.
taso ilo li suli! luka mi li lili.
ilo li tawa anpa. pakala a!!!!!

toki lili nanpa tu wan: musi sike



suno li seli. taso, telo li lete pona.
mi musi kepeken sike.
mi musi mute a.
sike li tawa sewi. sike li tawa
anpa.
sike li tawa weka. mi wile alasa!
sike li lon seme? a, mi jo e ona.
taso, a! mi pilin pakala.
mi jo ala e ijo ante...
mi jo ala e jan musi poka.

toki lili nanpa tu tu: kili sin



mi lukin e kili. mi sona ala
e kili.

kili li jelo lili li laso lili li
pona lukin.

mi esun e kili sin.

mi kama lon tomo mi.

mi tu e kili.

mi moku e kili ni kepeken
nasin seme?

sike lili pimeja kiwen li
moku ala moku?

mi wile kama sona.

mi uta e sike pimeja.

a, sona sin pi kili sin:
sike pimeja li moku ala!

toki lili nanpa luka: tawa suli



mi tawa kepeken noka.

mi lukin e nena suli mute. mi lukin e walo mute. mi lukin e jan ala. mi lukin e tomo ala.

noka mi li pilin ike. mi wile lape.

taso mi pilin lete. mi ken ala lape.

mi tawa. mi tawa. mi tawa.

mi lukin e tomo lili pimeja.

a, sewi li pona!

jan li pana e tomo e seli e moku.

mi lape pona.

tempo suno kama la mi tawa.

toki lili nanpa luka wan: esun



jan mute li lon esun.

mi wile esun e kala.

'o esun e kasi!' jan li toki.

mi wile e kala e kasi ala.

'o esun e waso!' jan ante li toki.

mi wile e kala e kasi ala e waso ala.

'o esun e pan suwi!' jan ante li toki.

mi lukin e pan suwi. ona li pona mute lukin.

mi wile e kala e pan suwi e kasi ala e waso ala.

toki lili nanpa luka tu: olin mun



mi en jan olin li lukin e mun.
jan olin li sona mute e mun.
mi sona ala e mun.
jan olin li pana e sona mun.
'mun ni li laso.'
'a, mun ni li lete.'
'a, ni li mun ma ala. ni li ilo jan.'
mi kute e toki ona. kalama uta
ona li suwi tawa mi. mi pilin lape.
lukin mi li pini.
mi lape la mi lukin e mun mute pi
jan olin mi.